

衢州文獻集成

「史部」

第
53
冊

衢州文獻集成

黃靈庚 諸葛慧艷

主編

〔史部〕

第
53
冊

國家圖書館出版社

第五三冊目錄

〔民國〕龍游縣志四十卷（卷三十四至四十）


余紹宋纂

民國十四年（1925）鉛印本

.....


龍游縣志

卷三十四 文徵二
卷三十五 文徵三



龍游縣志

卷之五 風俗三



龍游縣志卷三十四

縣人 余紹宋 輯

文徵

文二 明文

陳仲晉哀辭

王 禕

文徵二



仲晉陳氏諱潛仲晉其字也其先趙州普寧人五世祖忠私諡茂行先生四世祖安贈資德大夫在金皆不仕入國朝至忠定公天祐文忠公天祥兄弟而仕乃顯忠定仲晉曾大父也大父夔芑陂屯田萬戶父思讓晦德不耀而從父思謙今爲淮西肅政廉訪使自屯田官於衢因留居焉故仲晉今家衢之龍游仲晉少英俊讀書善記誦年十九用例入國子學爲弟子員既滿年積分入優等當釋褐授官會丞相廣平王開監修國史府仲晉見推擇爲掾史及王罷相遷掾史宣政院亡何宰相聞其才擢中書省掾史著令凡以布衣爲一品府掾者悉歷九十月得七品官或轉而掾中

書出身即得官六品於是仲晉歷月已通及八十不幸遽得疾死其死以至正十年某月日得年三十有七先是仲晉在宣政從帝師至五台山風土不宜因感羸疾明年入京師扈駕上京往來勞勩感疾益深既還京師疾少間宰臣趨起治事而仲晉所掌有重獄獄成抱具獄稟堂上自朝及夕力不能堪歸就寓舍疾增劇遂以不起仲晉操廉介家素貧又久病既死囊無留資中書援故事給錢爲賻同舍生又相與合錢始克買棺以歛而返柩南方嗚呼是可哀也已始予識仲晉錢唐一見如平生歡厥後同客京師情好尤篤每相見輒竟日談論傾盡底裏誼若骨肉然仲晉爲人倜儻不立崖岸其與人交皆然非於予獨然也今年春余將南還往別仲晉惟其形神消耗已甚爲之怵然心固憂其必死南還未幾則聞仲晉果死矣夫以仲晉之才之美使有所就以行其志固亦何媿而夭折使之止於若此嗚呼是誠可哀也已仲晉無丈夫子有弟濬仲深亦與予善因爲哀辭以寄余哀以慰仲晉且遺仲深云

詞曰

噫嗟仲晉歸來兮衢之上水清土且溫子家三世居此兮有屋并有墳有親在堂望子顯榮兮及其身子今已矣孰繼爾後奉二親人孰不有死兮哀子之死良可歎爾居甚良兮九軌之涂摧爾轅爾璧有藉兮襦襲既備乃棄捐方壟而享遽闕以折兮彼天胡不仁匪天不仁兮窮達壽夭繫乎命宰臣卹爾友朋念爾贈金孔多兮返子之樞衢之濱子宜有知兮順爾之命心無冤噫嗟仲晉歸來兮爾家有屋有墳安爾神

右文采自王忠文公集禕字子充義烏人明初官翰林待制同知制誥使雲南死節得諡案陳潛事兩舊志未載觀文中云子家三世居此兮有屋有墳是其與吾縣之緣亦正不淺茲故補其事入軼聞并錄此篇以徵之

革象新書序

王禕

革象司天之書也鄱陽趙緣督先生所纂先生名友欽字子恭其先於宋有屬籍其學長於律法算數而天官星家之術尤精讀其書可見也其書有推步立成等篇皆

載占驗之例而革象者則天地日月五星四時之故歷象之制俱在焉然其爲言涉於蕪冗鄙陋反若昧其旨意之所在予因爲之纂次刪其支離證其僞舛釐其次第挈其要領於是辭益簡而旨加明矣夫司天之學儒者之所宜務而世顧恒置之弗講何哉有志於斯者即是書求之精微之奧從可得而知也

右文采自雞山范氏譜案金華叢書本王忠文公集未載禕嘗修改是書見四庫全書提要此其序也

革象新書序

宋 濂

革象新書者趙緣督先生之所著也先生鄱陽人隱遁自晦不知其名若字或曰名敬字子恭或曰友欽其名弗能詳也故世因其自號稱之爲緣督先生先生宋宗室之子習天官遁甲鈴式諸書欲以事功自奮一日坐芝山酒肆中逢丈夫脩眉方瞳索酒酣飲先生異而卽之相與談玄者頗久且曰汝來何遲也於是出囊中九還七返丹書遺之臨別先生問其姓名曰我扶風石得之也得之蓋世傳杏林仙人云先

生自是視世事若漠然不經意間往東海上獨居十年註周易數萬言時人無有知者惟傅文懿公立極獨畏敬之以爲發前人所未言先生復即棄去乘青驪從以小蒼頭往來衢婺山水間人不見其有所齎旅中之費未嘗有乏絕竟不知爲何術倦遊而休泊然坐亡遂葬於衢之龍游雞鳴山原有朱暉德明者龍游人也久從先生遊得其星曆之學因獲受是書而暉亦以占天名家暉旣沒其門人同里章濬深懼氓滅無傳亟正其舛訛刻於文梓而來徵濂爲之叙濂聞天官之說歷代所步必微有弗同蓋欲隨時考驗以合於天運而已自唐涉宋其法寢精至元爲尤密耶律文正王楚材以金大明曆後天乃損節氣之分減周天之秒去交終之率治月轉之餘以至兩曜五行後先出沒皆有以研窮之而正其失且以西域與中國地里相去之遠立爲里差以增損之名曰西征庚午元曆可謂無遺憾者矣已而許文正公衡王文肅公恂大史令郭公守敬復與南北日官陳鼎臣鄧元麟等徧叅歷代曆法重測日月星辰消息運行之變酌取中數以爲曆本即所定授時曆曆經歷議二書猶存

可考證弗誣也君子謂當世所推步者皆二三大儒會其精神博其見聞備其儀像

而後能造其精微今先生值天

宋學士集天作屋

書有禁之時又獨處大江之南且無所謂

觀天之器其所著書往往與諸公脗合而無異

宋學士集異作間

者雖絕倫之議有以致之

誠以人心之理本同故

原作固今依宋學士集正

皆相符而無南北之異也抑余聞西域遠在萬

里之外元既取其國有扎馬魯丁者獻萬年曆其測候之法但用十二宮而分爲三

百六十度至於二十八宿次舍之說皆若所不聞及推日月之薄蝕頗與中國合者

亦以理之同故也嗚呼四海內外凡圓顙方趾之民其心皆同其理皆不殊也豈獨

占天之事爲獨然哉先生之易已亡於兵燼所著兵家書暨神仙方技之言亦不存

其所存者僅止此而已當與曆經並行無疑濂故特序先生之事於篇首使讀者知

先生之學通乎天人庶幾相與謹其傳焉

右文康熙志所載今以彭刻宋學士集校正之學士此序當序緣督原書非

序王緯改定本也濂浦江人正統中追諡文憲

寶蓋山實際禪居記

題宋
學士集

宋 濂

衢之龍游北三十五里有山曰寶蓋川媚山明林樾鬱蒼儼與靈區奧壤相峙然僻在下邑無有啓其闕者初廬江有沙門良亮乃東州永公之弟子也沙門年既壯出遊叢林歷扣諸師久未有證入聞千巖師長說法發之義烏伏龍山亟往見之禪師普應國師本公之嫡子門庭浩蕩俊柄雲擁見沙門爲人誠恪可與進修加警策之已兩命司藏鑰使日閱經律論諸文久之陞第一禪師間謂沙門曰如如眞性迴出根塵祥光發現照燭乾坤非有絕念之深功不能超出死生而入常寂之場子盍縛茅於重山蜜林而究明之乎沙門躍然以喜即日下山選地以居之至正丁酉春行至今所俯仰四顧有以愜其志遂駐錫焉遐邇嚮慕奔走恐後富者捐資貧者效力伐石於岩掄材於林梓人運斤斲師獻巧不戒而集猶務其私僅二三年功即就緒法堂三楹間成未幾釋伽殿又成其楹間如法堂之數中設三世如來之像左右翼以天王皆用黃金塗之兼之床座彩旛及供具清靜肅嚴觀者起敬庫院僧室在東

西又如佛殿之數兩廡則溢其伍別敞門樓以爲出入之地經衛曲折而蓮池品列於前四圍有水環之蓋一倣伽藍之制沙門因出實際遂以名其禪居云惟大覺世尊其道所被甚廣無與比倫人徒見中國九州能嚴奉之殊不知西南諸國如呵羅單于陀利之屬以道里計近或數千遠且二三萬餘而尊崇爲尤至國君相祝常以世尊如來稱之則其他概可知也此姑置之勿論又自西方言之自中國歷十萬里至五印度從五印度以西又越大海二重始抵西入之境道塗比前奚翅數倍其所歷城郭人民繁衍富麗又百倍於中國其地惟知有佛教而已餘皆無有也至於巷談里語一舉佛言以爲法戒稍有不信而妄行者衆共棄之以此而觀若東若北莫不皆然是故鄭漁仲有云佛之書徧布天下而儒家之言不越於跋提河蓋有以也然乃史傳所載及東伐西使親擊者之所言咸屬南閩浮提南閩浮提則妙高山四隅之一爾經有百億日月百億妙高山皆漸佛教則又非管窺蠡測之所敢知也或者則曰佛書多取譬之言果可盡徵乎曰吾儒亦有之也騶衍謂天下有九九州而

一九州則有裨海環之人民禽獸莫能相通如此者九則有大瀛海環其外乃天地際焉禹之所序中國九州其於天下八十一分居其一耳豈獨佛書言之哉余嘗惡夫淺見狹聞之士不足以語大方類夫營寧生人身中游泳腸胃自謂江河之廣周流府藏自詫萬里之遠不知身外之境初無涯涘也所以輕於論議迂固僻陋聞者爲之失笑其不智也亦甚矣今因沙門請記余故特一言之使入此禪居者讀吾之文又有以知大覺世尊其道所被甚廣無與比倫則嚴奉之心愈堅嚴奉之心愈堅則將世世嗣而葺之俾不墜壞庶有以副沙門之所願欲若但紀其興起歲月稍涉文學者人人能爲之又奚假於余哉沙門號西山精進入道至老猶不懈云

右文錄自宋學士集案兩舊志僅錄其前段至遂以名其禪居云止改其題爲實際院記畧殆以後段推崇佛教恐人斥爲異端故不敢錄耳實迂見也

原碑已佚

龍游重建證果寺記

宋 濂

我釋家文佛慈闔有情設宏闊勝大之教真應弘願罔不霑被故凡日月之所照霜露之所墜皆沐浴至化出離苦輪得清淨行列禦寇書所載不治而不亂不言而自信不化而自行蕩蕩乎人無能名者信不誣矣是故塔廟之所在金碧焜煌照耀無際雖其淪壞有時或圯乎數曾未幾何又皆興復如初觀乎此者可見大法之流行與天地相爲無窮者矣衢之龍游縣東四十五里有證果道場實始於唐貞觀初縣人士虞道延捐宅宇爲之悉入腴田其中已而祝髮受具戒爲開山第一祖且以的傳自號修習禪觀誓不忘於正宗一時龍象聞風全集稱爲虞延法師云唐季之亂變爲瓦礫之區在宋之初休堂慧公嘗重興之至宋季又廢無住行公入主法席又從而興之逮元季又廢今住持靜山仁公與其同袍本全周公謀曰茲寺自法師創建以來甲乙相傳克底於今日不翅七百餘年之久一旦使其堙墜吾儕之恥也盍相與起其廢乎周公曰然諾之各捐私橐之積以爲衆倡乃持歷走民間民有力者嘉二公之惇懇各施其所有遂命斲木陶土之士相與從事至正癸卯二月某甲子